

景明刻本夷門廣牘

三六

02 標
081.3
128
:53

五柳齋歌卷之三

晉靖節徵士陶潛撰

明嘉禾周履靖和韻

五言詩

形影神三首 幷序

貴賤賢愚莫不營營以惜生斯甚惑焉
故極陳形影之苦言神辨自然以釋之
好事君子共取其心焉

形贈影

天地長不沒山川無改時草木得常理霜露榮
悴之謂人最靈智獨復不如茲適見在世中奄
去靡歸期奚覺無一人親識豈相思但餘平生
物舉目情悽沛我無騰化術必爾不復疑願君
取吾言得酒莫苟辭

和

穹蒼未不晦黃河難清時禽獸與花卉盛衰相
隨之人爲萬物靈榮悴亦同茲徒作千載謀焉

得百歲期白晝衆憂集良宵萬種思一朝精氣竭
悽悽雙眼渦駐顏無妙訣幻化何必疑爲樂
在年少遇飲休云辭

影答形

存生不可言衛生每苦拙誠願游崑華邈然茲
道絕與子相遇來未嘗異悲悅憩蔭若暫乖止
日終不別此同旣難常黯爾俱時滅身沒名亦
盡念之五情熱立善有遺愛胡爲不自竭酒云
能消憂方此詎不劣

和

生死無貴賤莫辨巧與拙數盡疾患侵神勞氣
欲絕朝夕每相隨與爾同愁悅晝寢與宵眠爾
我暫云別人生豈久長頃間遂能滅制欲如灰
寒涵心祛燥熱何慮處世貧但恐壺內竭烏免
旦暮催不論賢與劣

神釋

大鈞無私力萬理自森著人爲三才中豈不以
我故與君雖異物生而相依附結託善惡同安

得不相語三皇大聖人今復在何處彭祖壽未
年欲留不得住老少同一死賢愚無復數日醉
或能忘將非促齡具立善常所欣誰當爲汝譽
甚念傷吾生正宜委運去縱浪大化中不喜亦
不懼應盡便須盡無復獨多慮

和

天網鑒恢恢應報分明著形居大塊間紛紜多
世故得失在目前驕奢艱苦附悟此先達機意
到渾無語堯舜暨禹湯同歸北邙處日月如車

輪長繩難挽住生死誰預知晝夜應無數良謀
置腴田何如親酒具智者戀醉鄉百世流芳譽
萬事聽自然泰榮任來去遇順不足欣逢逆胡
可懼寸心苟無欺朝夕斯忘慮

述酒

舊注儀狄造杜康潤色之

重離照南陸鳴鳥聲相聞秋草雖未黃融風久
已分素礫晶脩渚南嶽無餘雲豫章抗高門重
華固靈墳流淚抱中歎傾耳聽司晨神州獻嘉

栗西靈爲我馴諸梁董師旅羊勝喪其身山陽
歸下國成名猶不勤卜生善斯牧安樂不爲君
平王去舊京峽中納遺薰雙陵甫云育三趾顯
奇文王子愛清吹日中翔河汾朱公練九齒閑
居離世紛義峩西嶺內偃息常所親天容自永
固彭殤非等倫

和

幽懷惟在酒塵事性厭聞三杯意始悅一醉百
憂分幻身看掣電澆世苦浮雲出郭閑登眺愁

見墓與墳宿鳥知景夕忘雞報曉晨旨酒歡相
洽哦詩性自馴梅花供逸興山鶴伴閒身存心
惟是拙把盞意甚勤辭章羨靖節道德宗老君
得失渾無定功名若猶薰喜歌酒德頌不讀送
窮文高懷愛籬菊野興泛河汾狂歌祛俗慮痛
飲掃塵紛生平無所嗜唯與樽酒親窮居甘貧
賤敢與古人倫

止酒

居止次城邑逍遙自閑止坐止高蔭下步止草

門裏好味止園葵大懽止稚子平生不止酒止
酒情無喜暮止不安寢晨止不能起日日欲止
之營衛止不理徒知止不樂未知止利已始覺
止爲善今朝真止矣從此一止去將止扶桑涘
清顏止宿容奚止千萬祀

和

逃名止華岳誅茅可居止踞止蒼松陰行止古
洞裏盤食止蕨薇悅止挈幼子情性懶止酒止
酒心勿喜卧止玉漏聲日止紅日起餘事能止

時衛生止道理但聞止不欣焉審止爲已知止
静能安故止曰得矣只今止以行豈止於涯涘
壽考止千齡德止後世祀

詠二疏并序

漢疏廣傳廣字仲翁爲太子太傅兄子
受爲太子少傅在位五歲廣謂受曰知
足不辱知止不殆今仕宦至二千石名
立如此不去懼有後悔豈如父子相隨
出關歸老故鄉不亦善乎卽日上疏乞

骸骨宣帝許之公卿大夫故人邑子設
祖道供帳東都門外送者車數百兩觀
者皆曰賢哉二大夫廣歸鄉里日具酒
食故舊賓客與相娛樂

大象轉四時功成者自去借問衰周來幾人得
其趣游目漢庭中二疏復此舉高嘯返舊居長
揖諸君傳餞送傾皇朝華軒盈道路離別情所
悲餘榮何足顧事勝感行人賢哉豈常譽厭厭
間里歡所營非近務促席延故老揮觴道平素

問金終寄心清言曉未悟放意樂餘年遑恤身
後慮誰云其人亾久而道弥著

和

高爵與厚祿上疏飄然去唐虞共商周誰識挂
冠趣兩疏誠見機漢室誰能舉婆娑卸弁裳慷慨
辭太傅杯酒送長亭車馬填岐路淒淒各分袂
登軒弗回顧高風遺萬年當代播芳譽欣欣
樂故鄉何肯干時務晤對喜盈眸一樽抒其素
身閒入隱淪心朗道自悟快哉憩林泉長夜飲

無慮斯人不可攀昭昭青史著

詠三良并序

三良者子車氏子奄息仲行鍼虎秦穆
公歿康公從治命以三子爲殉國人哀
之賦黃鳥

彈冠乘通津但懼時我遺服勤盡歲月常恐功
愈微忠情謬獲露遂爲君所私出則陪文輿入
必侍丹帷咸規嚮已從計議初無虧一朝長逝
後願言同此歸厚恩固難忘君命安可違臨穴

固惟疑投義志攸希荆棘籠高墳黃鳥聲正悲
良人不可贖泣然沾我衣

和

三良誠異節芳聲千載遺賢良耀今古赤膽雄
不微求懷報主義寸心一無私行行從車蓋憩
息佇錦帷出入循其矩至論弗令虧君命卽長
逝歡顏慷慨歸洪德重山岳釣旨豈敢違毅然
入土穴高風誰能希愁雲覆棄草悽悽令我悲
國人賦黃鳥聽之泪沾衣

詠荆軻

燕丹善養士志在報強嬴招集百夫良歲暮得
荆卿君子死知已提劍出燕京素驥鳴廣陌慷慨
送我行雄髮指危冠猛氣充長纓飲餞易水上
四座列群英漸離擊悲筑宋意唱高聲蕭蕭
衰風逝淡淡寒波生商音更流涕羽奏壯士驚
心知去不歸且有後世名登車何時顧飛蓋入
秦庭凌厲越萬里逶迤過千城圖窮事自至豪
主正怔營惜哉効術踈奇功遂不成其人雖已

沒千載有餘情

和

六國稱燕丹所志滅秦嬴廣募天下士偶喜遇
荆卿威猛勝百夫挾匕離神京鞚驄馳古道奮
迅向前行俠氣冲牛斗昂昂振其纓易水三杯
盡慷慨辭豪英擊筑有漸離悠悠歌別聲悲風
吹客袂悽情頃爾生毅然厲志往茲行誠足驚
一去何能返惟能播芳名長揖弗回首亟赴秦
皇庭驅馳登遠道飄颻歷千城秘計藏圖冊軻

心時經營却恨籌踈拙功勲惜無成身亾百世
後猶懷壯士情

九日閑居 幷序

余閑居愛重九之名秋菊盈園而持醪
靡由空服九華寄懷於言

世短意常多斯人樂久生日月依辰至舉俗愛
其名露婁暄風息氣澈天象明徃燕無遺影來
鴈有餘聲酒能祛百慮菊爲制頽齡如何蓬廬
士空視時運傾塵爵耻虛罍寒華徒自榮歛襟

獨閑謠緬焉起深情棲遲固多娛淹留豈無成

和

每惜歲易邁恒慮虛其生更喜實其腹何肯沽
斯名涼飈動襟袂皓魄照人明籬落黃花色庭
除促織聲撫景堪題詠餐英可延齡兀坐頽簷
下壺觴向月傾但恐罇內竭不羨世上榮嘯傲
忘爾我高歌暢幽情欲爲千歲計此計胡能成

遊斜川

并序

辛丑正月五日天氣澄和風物閑美與

二三鄰曲同遊斜川臨長流望曾城鮫

鯉躍鱗於將夕水鷗乘和以翻飛彼南

阜者名實舊矣不復乃爲嗟歎若夫曾

城傍無依接獨秀中臯遙想靈山有愛

嘉名欣對不足率爾賦詩悲日月之遂

往悼吾年之不留各疏年紀鄉里以記

其時日

開歲倏五日吾生行歸休念之動中懷及辰爲
茲游氣和天惟澄班坐依遠流弱湍馳文鮫閑

谷矯鳴鷗逍澤散游目繙然睇曾丘雖微九重
秀顧瞻無匹儕提壺接賓侶引滿更獻酬未知
從今去當復如此否中觴縱遙情忘彼千載憂
且極今朝樂明日非所求

和

光景易代謝人生貴知休良辰不易遇拉友川
上游趺坐依芳草披襟面中流漁艇漾碧波汀
沙眠白鷗弱柳含金色新鶯出林丘情與山水
契人共魚鳥儔開樽盡其量詩成何必酬興追

此夕歡未知明日不數子同嘯傲高歌可忘憂
壺觴性所嗜冠蓋奚容求

和郭主簿二首

謫謫堂前林中夏貯清陰凱風因時來回飈開
我襟息交游閑業卧起弄書琴園蔬有餘滋舊
穀猶儲今營已良有極過足非所欽春秋作美
酒酒熟吾自斟弱子戲我側學語未成音此事
真復樂聊用忘華簪遙遙望白雲懷古一何深

和

臨風踞苔石翛然憩槐陰孤雲停遠漢荷氣襲
清襟枝頭山鳥語聲脆如鳴琴摊書覺有益研
究知古今衡門人共羨道德世所欽來韻閒堪
和濁醪興獨斟翔鶴空中影飛泉澗底音嘯傲
烟霞裏何必問朝簪世路竟已違山林不厭深

其二

和澤周三春清涼素秋節露凝無游氛天高風
景澈陵岑聳逸峯遙瞻皆奇絕芳菊開林耀青
松冠巖列懷此貞秀姿卓爲霜下傑衡觴念幽

人千載撫爾訣檢素不獲展厭厭竟良月

和

皓魄吐光華開襟值嘉節玉露浥秋蘭金風林
杪澈白雲滿穹蒼萬疊無斷絕層陰松底稠清
影當牖列翠柏挺岡陵堪擬人中傑行樂是嘉
言縱酒誠妙訣人生不久長莫負好歲月

移居二首

昔欲居南村非爲卜其宅聞多素心人樂與數
晨夕懷此頗有年今日從茲役弊廬何必廣取

足蔽床席鄰曲時時來抗言談在昔奇文共欣
賞疑義相與析

和

喧囂厭塵市徙居苧村宅墟閒但植梅藝圃怡
朝夕窮年計有期何肯被塵役高堂非吾願陋
室陳几席溪橋故人來把酒論徃昔意到賦新
詩衷情句內析

其二

春秋多佳日登高賦新詩過門更相呼有酒斟

酌之農務各自歸閑暇輒相思相思則披衣言
笑無厭時此理將不勝無爲忽去茲衣食當須
紀力耕不吾欺

和

春課耕南畝客至酒共詩狂歌拚一醉興盡任
所之農人告木旱力稼動憂思勃然禾黍茂忽
爾刈穫時稻梁登場圃妻孥欣在茲還從勤苦
得昊天信無欺

贈羊長史 松齡

左軍羊長史銜使秦川作此與之

愚生三季後慨然念黃虞得知千載外正賴古
人書賢聖留餘跡事事在中都豈忘游心目關
河不可踰九域庸已一逝將理舟輿聞君當先
邁負疴不獲俱路若經商山爲我少躊躇多謝
綺與角精爽今何如紫芝誰復採深谷久應蕪
駟馬無貴患貧賤有交娛清謠結心曲人乖運
見疎擁懷累代下言盡意不舒

和

吾儕希古道企仰嘉唐虞心究道與德日誦墳
典書漢魏重詞賦華藻在二都賢關與聖域軌
範胡敢踰不入五侯宅路僻寡車輿幽懷諧木
石栖遲雲水俱處世惟落魄看山多踟躇常羨
陶五柳高致誰能如掛冠賦歸來三徑就荒蕪
種菊東籬下樽酒日歡娛民澆風俗頽代遠淳
朴踈落落性寡合聊將詩酒舒

怨詩楚調示龐主簿遵鄧治中

天道幽且遠鬼神茫昧然結髮念善事僥俛六

九年弱冠逢世阻始室喪其偏炎火屢焚如蟻
蜮恣中田風雨縱橫至收歛不盈廛夏日長抱
飢寒夜無被眠造夕思雞鳴及晨願烏遷在已
何怨天離憂悽目前吁嗟身後名於我若浮煙
慷慨獨悲歌鍾期信爲賢

和

所志唯在道蒼穹胡使然愁蹙兩眉睫迫遭十
餘年不獨貧病集喪偶又喪偏家奴背主遁亢
旱荒腴田徭役無計避鬻房遠市廛終朝猶艱

食夜寢憐獨眠韓公送窮語順至逆可遷何足
掛臂臆得失後與前富貴逞驕奢過眼如雲煙
但能明道德貧者亦稱賢

庚子歲五月中從都還阻風於規林二首

行行循歸路計日望舊居一欣侍溫顏再喜見
友于鼓棹路崎曲指景限西隅江山豈不險歸
予念前途凱風負我心戢柂守窮湖高莽眇無
界夏木獨森踈誰言客舟遠近瞻百里餘延目

識南嶺空歎將焉如

和

仲夏歸興急何能返故居未得承親悅無由樂
友于風阻帆檣滯雲暝江水隅豈畏波浪惡崎
嶇涉長塗鳬鷺遍遊目桂楫殢澄湖山川望不
極遠樹盼全疎夢寐在鄉井身寄千里餘抵岸
知誰日安居樂晏如

其二

自古歎行役我今始知之山川一何曠異坎難

與期崩浪聒天響長風無息時久游戀所生如
何淹在茲靜念園林好人間良可辭當年詎有
幾縱心復何疑

和

世云涉道險此日方監之重雲連遠水入望何
盡期狂風掀巨浪聲撼無停時安危未可卜惶
惶迢迢茲中流難定止淪溺何計辭處世亦如
是覩此信弗疑

辛丑歲七月赴假還江陵夜行塗中

閒居三十載遂與塵事冥詩書敦宿好林園無
俗情如何捨此去遙遙至南荆叩棖新秋月臨
流別友生涼風起將夕夜景湛虛明昭昭天宇
闊自鼎鼎川上平懷役不遑寐中宵尚孤征商歌
非吾事依依在耦耕投冠旋舊墟不爲好爵榮
養直衡茅下庶以善自名

和

林栖悅所志始覺世路冥開卷對賢聖鳴琴理

性情無由辭茲往迢迢赴湖荆晚烟渡口暝海
月水底生悠悠村落夕耿耿河漢明夜闌天籟
寂舟靜一川平歸心濃似酒不寐向前征趨榮
信何益谷口樂巖耕弃冠如脫屣豈爲利祿榮
絃歌衡門下安期斯世名

癸卯歲始春懷古田舍二首

在昔聞南畝當年竟未踐屢空旣有人春興豈
自免夙晨裝吾駕啟塗情已緬鳥哢歡新節冷
風送餘善寒竹被荒蹊地爲罕人遠是以植杖

翁悠然不復返卽理愧通識所保詎乃淺

和

素志懷西疇閒身今始踐荷鋤意不違簷衣豈能免稼穡情所諧榮祿無心繙枝頭鳴鶴鳴茅屋亦稱善土腴桑柘肥村幽塵自遠使得農家樂徜徉何肯返處世固非難但愧我才淺

其二

先師有遺訓憂道不憂貧瞻望邈難逮轉欲志長勤秉耒歡時務解顏勸農人平疇交遠風良

苗亦懷新雖未量歲功卽事多所欣耕種有時
息行者無問津日入相與歸壺漿勞近鄰長吟
掩柴門聊爲隴畝民

和

禾稼稔畎畝農家豈謂貧秋深滿塲圃因知春
務勤朝犁驅黃犢晝餉犬近人桔槔逢薄暮樹
杪月色新碧水平畦岸盈盈意自欣肩車歸茅
屋漁艇渡渌津索魚問蓬底貰酒過北鄰歲晚
徵輸畢逍遙太古民

丙辰歲八月中於下灘田舍穫

貧居依稼穡戮力東林隈不言春作苦常恐負所懷司田眷有秋寄聲與我諧飢者歡初飽束帶候鳴雞揚櫟越平湖汎隨清壑迴轡轡荒山裏猿聲閑且哀悲風愛靜夜林鳥喜晨開曰余作此來三四星火頽姿年逝已老其事未云乖遙謝荷蓀翁聊得從君栖

和

資身在畎畝秉耒耕村隈春能殫其力秋至有

好懷晨夕親稼穡情與農父諧郊畔特乳犢桑
杪鳴午雞曉起看星沒薄暮披簾廻悲風踈林
吼征鴈雲邊哀雨聲夜入耳重雲亭午開枕林
登場廣荷責力未頽欣然樂田舍榮名心久乖
遙追鄭子真期共谷口栖

乙巳歲三月爲建威參軍使都經錢溪

我不踐斯境歲月好已積晨夕看山川事事悉
如昔微雨洗高林清飈矯雲翮卷彼品物存義

風都未隔伊余何爲者劖劖從茲役一形似有
制素襟不可易園田日夢想安得久離析終懷
在歸舟諒哉宜霜柏

和

大道久不聞塵滓胷中積世路事事非山水仍
是昔草木布陽和社燕翻輕翮經溪情緒乖入
望雲樹隔豈能冒風霜不堪被行役奔馳苦窮
途所志焉肯易衷腸向誰言惟憑數語析歸帆
若迅駛明月照古柏

戊申歲六月中遇火

草廬寄窮巷甘以辭華軒正夏長風急林室頓
燒燔一宅無遺宇舫舟蔭門前迢迢新秋夕亭
亭月將圓果菜始復生驚鳥尚未還中宵佇遙
念一盼周九天總髮抱孤念奄出四十年形迹
憑化往靈府長獨閑貞剛自有質玉石乃非堅
仰想東戶時餘糧宿中田鼓腹無所思朝起暮
歸眠旣已不遇茲且遂灌西園

和

栗里淳更朴淵明葺小軒季夏鄰火發居處頃
爾燔片椽毀無跡瓦礫堆庭前秋月還依舊皎
皎仍復圓廢址惟衰草梁燕無復還愁緒滿胷
臆知命豈怨天生平抱道德何期罹乖年逆遭
有定數惟使此心閒偃蹇志不易恬然靖節堅
莫謂籬無菊猶欣郭有田奚容雞犬宿便於狐
兔眠誅茅重結構卜築在南園

己酉歲九月九日

靡靡秋已夕淒淒風露交蔓草不復榮園木空

自凋清氣澄餘滓杳然天界高哀蟬無歸響叢
鴈鳴雲霄萬化相尋繹人生豈不勞從古皆有
沒念之中心焦何以稱我情濁酒且自陶千載
非所知聊以永今朝

和

露下天氣肅涼炎林杪交南陌千畦秀空林萬
木凋綠水芙蓉媚天邊鴈翅高籬畔繁黃菊好
月吐青霄覩客狂落帽刈禾農父勞逢時須進
酒休使寸心焦高歌信口出旣醉樂陶陶生死

王右軍集 卷三
十一
無定限何必計來朝

庚戌歲九月於西田穫早稻

人生歸有道衣食固其端孰是都不營而以求
自安開春理常業歲功聊可觀晨出肆微勤日
入負耒還山中饒霜露風氣亦先寒田家豈不
苦弗獲辭此難四體誠乃疲庶無異患于盥濯
息簷下斗酒散襟顏遙遙沮溺心千載乃相關
但願長如此躬耕非所歎

和

居家何所事耕織以爲端車廻晝不息宵織婦
不安三春能努力深秋禾可觀負鋤戴星出荷
笠冒露還黃雀喧殘照西風襲袂袂寒此日及西
疇方知稼穡難依時輸徵稅州郡豈能干登場
灌我足樽酒酡其顏長歌卧蓬戶柴門盡日關
勤勞延歲月無復生嗟歎

歲暮和張常侍

市朝悽舊人驟驥感悲泉明日非今日歲暮余
何言素顏斂光潤白髮一已繁闊哉秦穆談旅

力豈未愆向夕長風起寒雲沒西山癟癟氣遂
嚴紛紛飛鳥還民生鮮常在矧伊愁苦纏屢闕
清酤至無以樂當年窮通靡攸慮顚願由化遷
撫已有深懷履運增慨然

和

韶光去不返恰似川上泉春花復冬雪迅速豈
堪言鏡中易顏色蓬鬢猶絲繁道德未全究何
能釋其愆曉日忽西墜皎月昇東山晴霞幻五
色倦鳥知飛還焉能長壽考况多孽緣纏遇酒

弗暢飲虛生度流年富貴與貧賤倏爾易變遷
靜觀有定數何如樂自然

五月旦作和戴主簿

虛舟縱逸棹回復遂無窮發歲始俛仰星紀奄
將中南窓罕悴物北林榮且豐神淵寫時雨晨
色奏景風既來孰不去人理固有終居常待其
盡曲肱豈傷冲遷化或夷險肆志無窊隆卽事
如已高何必升華嵩

和

閑居北窓下幽然興不窮仲夏貽新句高情寓
此中榴花檻畔灼齒首沼中豐弗用搖紈扇松
間來薰風人生匪金石百年亦有終慮寡心常
逸身閒意自冲陟世多險阻玄修道自隆闔戶
成山林何必慕恒嵩

示周續之祖企謝景夷三郎

負癆頹簷下終日無一欣藥石有時閑念我意
中人相去不尋常道路邈何因周生述孔業祖
謝響然臻道喪向千載今朝復斯聞馬隊非講

肆校書亦已勤老夫有所愛思與爾爲鄰願言
誨諸子從我頴水濱

和

芸窓究經史意到殊自欣探彼三代語精蘊啓
後人立言俱契道敷教皆有因仲尼刪詩書斯
世學者臻易理最難達至道豈易聞非圖過耳
旦暮惟事勤克志終不怠頴孟爲比鄰高風
標青史千載仰海濱

始作鎮軍叅軍經曲阿

弱齡寄事外委懷在琴書被褐欣自得屢空常晏如時來苟冥會婉變憩通衢投策命晨裝暫與園田踈眇眇孤舟逝鱗鱗歸思紆我行豈不遙登陟千里餘目倦川塗異心念山澤居望雲慙高鳥臨水愧游魚真想初在襟誰謂形蹟拘聊且憑化遷終返班生廬

和

早歲性耽讀時契古人書囊螢與映雪常愧吾弗如適有遠遊興志在登天衢金門思獻策鄉

井日已踈迢迢雲水閣回首路繁紆不憚關河
遠心追萬里餘烟樹障吾目自雲覆吾居危檣
集海燕桂櫟驚遊魚名韁與利鎖此身冠裳拘
得遂生平志還當返故廬

還舊居

疇昔家上京六載去還歸今日始復來惻愴多
所悲阡陌不移舊邑屋或時非履歷周故居鄰
老罕復遺步步尋徃迹有處特依依流幻百年
中寒暑日相推常恐大化盡氣力不及衰撥置

且莫念一觴聊可揮

和

去家忽六載倦游始言歸松菊半凋落俯視令人悲田園喜猶昔世事已覺非盤桓鄰巷曲野老弗我遺會晤話親故歡然情相依歲月如瞬息昇沉旦暮推對景追歡笑莫待朱顏衰遠却塵中網壺觴盡日揮

和劉柴桑

山澤久見招胡事乃躊躇直爲親舊故未忍言

索居良辰入奇懷挈杖還西廬荒塗無歸人時
時見廢墟茅茨已就治新疇復應畬谷風轉淒
薄春醪解飢劬弱女雖非男慰情良勝無栖栖
世中事歲月共相踈耕織稱其用過此奚所須
去去百年外身名同翳如

和

入山與逃海奚俟多躊躇枯槎能汎水深林可
隱居紫蕨聊充茹白雲護吾廬村寂無塵擾惟
餘草榮墟樹密翳清陰禾黍年盈畬魚鳥情相

狎詩酒意勤劬琴書盈几榻思慮靈臺無日喜
山水洽漸覺世路踈羽毛堪成績供織俟其須
身謝千載後鄉評謂何如

酬劉柴桑

窮居寡人用時忘四運周櫚庭多落葉慨然已
知秋新葵鬱北牖嘉穟養南疇今我不爲樂知
有來歲不命室携童弱良日登遠游

和

人事幾遷變倏爾復一周梅花雪中看又值黃

菊秋良辰忙裏過形骸非昔疇與君此夕晤未
知明日不爲樂當乘時携樽花間遊

與殷晉安別

并序

殷景仁名鐵先作晉安南府長史掾因
居潯陽後作太尉劉裕參軍移家東下作
此以贈

遊好非久長一遇盡殷勤信宿酬清話益復知
爲親去歲家南里薄作少時鄰負杖肆游從淹
留忘宵晨語默自殊勢亦知當乖分未謂事已

及興言在茲春飄飄西來風悠悠東去雲山川
千里外言笑難爲因良才不隱世江湖多賤貧
脫有經過便念來存故人

和

遇子情更洽晤言意甚勤傾倒忘去住意氣尤
相親今夕話遠別昔時爲比鄰離懷訴未盡窓
雞報侵晨不堪對卮酒豈忍襟袂分征鴈傳秋
信隴梅寄早春滔滔東流水漠漠天際雲羨人
隔雲水覲顏苦無因友誼膠投漆豈論富與貧

何年返閭里壺觴醉故人

癸卯十二月中作與從弟敬遠

痕迹衡門下貌與世相絕顧眄莫誰知荆扉晝

常閉

音別閨也

淒淒歲暮風翳翳經日雪傾耳無希

聲在目皓已潔勁氣侵襟袖簞瓢謝屢設蕭索

空宇中了無一可悅歷覽千載書時時見遺烈

高操非所攀深得固窮節平津苟不由栖遲詎
爲拙寄意一言外茲契誰能別

和

屏足憇荆扉情忘塵自絕喧囂揔不聞閒門白
雲閑鳥聲雜清歌梅英傲冰雪靜養襟天和洗
心惟事潔古研棐几陳焦桐榻上設盤桓一室
內蕭然幽抱悅青史間中披晤對企高烈獨羨
陶徵君弃冠全靖節我本山林徒此生甘守拙
詩懷寄隱淪一任彼鑒別

和胡西曹示顧賊曹

蕤賓五月中清朝起南颸不駛亦不遲飄飄吹
我衣重雲蔽白日閑雨紛微微流目視西園暉

曄榮紫葵於今甚可愛柰何當復衰感物願及
時每恨靡所揮悠悠待秋稼寥落將賒遲逸想
不可淹猖狂獨長悲

和

夏半苦炎燠松下納清颸盤枝成偃蓋重陰覆
締衣閒雲停遠漢鶯聲出翠微碧沼開菡萏空
庭灼榴葵妍華苦不久旬日忽爾衰爲樂趁光
景杯酒及時揮秋來霜霰至蕭索興已遲窮達
總如是思之令人悲

答龐參軍

并序

三復來貺欲罷不能自爾鄰曲冬春再
交欵然良對忽成舊游俗諺云數面成
親舊况情過此者乎人事好乖便當語
離楊公所歎豈惟常悲吾抱疾多年不
復爲文本旣不豐復老病繼之輒依周
孔往復之義且爲別後相思之資

相知何必舊傾蓋定前言有客賞我趣每每顧
林園談詣無俗調所說聖人篇或有數斟酒闌

飲自歡然我實幽居士無復東西緣物新人惟
舊羽毫多所宣情通萬里外形跡滯江山君其
愛體素來會在何年

和

締交非尋常時喜聆嘉言良辰豈易值乘興過
我園命子開宿酒歌我閒雲篇情投不辭醉得
句共欣然但知詩酒趣渾忘塵世緣偶爾成神
句幽意爲君宣高懷凌碧漢隱迹寄青山與君
此夕訂相期樂暮年

於王撫軍座送客

秋日淒且厲百卉具已腓爰以履霜節登高餞
將歸寒氣冒山澤游雲倏無依洲渚四緬邈風
水互乖違瞻夕欲良讌離言聿云悲晨鳥暮來
還懸車飲餘輝逝止判殊路旋駕悵遲目送
回舟遠情隨萬化遺

和

踈林涼颺生衰柳漸覺腓江干開餞酌計子何
日歸雲山千里障入望思依依離情歌剴切分

袂意重違落景偏增悵秋風聽更悲歸鳥投林
息行舟月色輝弗謂崎嶇道鴻音附暮遲送別
渾無語新詩佇待遺

連雨獨飲

連生會歸盡終古謂之然世間有松喬於今定
何闕故老贈余酒乃言飲得仙試酌百情遠重
觴忽忘天天豈去此哉任真無所先雲鶴有奇
翼八表須臾還自我抱茲獨傀俛四十年形骸
久已化心在復何言

和

生死無定數古今皆同然錢鏗稱永壽于今亦
何悶蹲中常不竭豈用慕神仙宿雨荒林積彤
雲布蒼天得失任其所謙賞酒爲先烏鬚易堆
雪青春弗再還記得學舞劍倏爾五十年不須
憂貧賤爲樂是良言

有會而作

并序

舊穀旣沒新穀未登頗爲老農而值年
災日月尚悠爲患未已登歲之功旣不

可希朝夕所資煙火裁通旬日已來始
念饑乏歲云々矣慨然未懷今我不述
後生何聞哉

弱年逢家乏老至更長饑菽麥實所羨孰敢慕
甘肥怒如亞九飯當暑厭寒衣歲月將欲暮如
何辛苦悲常善粥者心深恨蒙袂非嗟來何足
吝徒沒空自遺斯濫豈彼志固窮夙所歸餒也
已矣夫在昔余多師

和

早歲逢家窘衰年值饑饑牀與脫粟亦可代
輕肥良宵惜無酒臘月悵單衣命運苟如此我
儻何足悲靜看富與貴轉眼忽已非何勝歌雅
調句逸足可遺堅志甘清操道德斯能歸世羨
陶五柳堪爲達者師

乞食

饑來驅我去不知竟何之行行至斯里叩門拙
言辭主人解余意遺贈豆虛來談話終日夕觴
至輒傾盆情欣新知歡言詠遂賦詩感子漂母

惠愧我非韓才銜戢知何謝冥報以相貽

和

因飢陟曲徑何處可止之索食療腹餒有酒亦
弗辭歡顏主人語謂我不易來開樽北牖下盡
興酒百杯醉去忘宇宙胡亂廢陶詩君多待賢
意吾豈淵明才一飯感大德言謝無所貽

責子

白髮被兩鬚肌膚不復實雖有五男兒總不好
紙筆阿舒已二八懶惰故無匹阿宣行志學而

不愛文術雍端年十三不識六與七通子垂九
齡但覓梨與栗天運苟如此且進杯中物

和

清霜侵鬢毛有子匪云實四男在膝前不能親
硯筆兆隆雖二六質鈍世無匹夢雷方五齡勉
強爲儒術夢震年四春一杯酒十飲七阿科方二
週弗乳卽噉栗柰何未成人奚必貪世物

諸人共游周家墓柏下

今日天氣佳清吹與鳴彈感彼柏下人安得不

爲歡清歌散新聲綠酒開芳頰未知明日事余
襟良已蟬

和

欣然憩嘉樹鳥音疑絃彈蒼翠浮襟袂對友成
佳歡衰草伴白骨清樽酡朱顏狂歌歸落日吾
儕興未殫

問來使

爾從山中來早晚發天目我屋南窓下今生幾
叢菊薔薇葉已抽秋蘭氣當馥歸去來中山山

中酒應熟

和

健足至中庭詢彼來天目孤鴈度哀聲東籬綻
黃菊白雲滿徑閒甕中酒初馥對菊試新芻園
蔬煮令熟

四時

春水滿四澤夏雲多奇峯秋月揚明輝冬嶺秀
孤松

和

春郊遍花柳夏雨暗山峯秋露浥籬菊冬雪積

蒼松

蜡日

音乍

蜡臘祭名伊耆氏始爲蜡蜡也者索也
歲十二月合聚萬物而索饗之也

風雪送餘連無妨時已和梅柳夾門植一條有
佳花我唱爾言得酒中適何多未能明多少章
山有奇歌

和

臘月風雪遍歲暮漸陽和楊柳含金色灞岸發
梅花競景幽懷適持杯吟興多醉來情更好慷慨
且高歌

悲從弟仲德

街東過舊宅悲淚應心零借問爲誰悲懷人在
九冥禮服名群從恩愛若同生門前執手時何
意爾先傾在數竟未免爲山不及成慈母沉哀
痛二胤纔數齡雙位委空館朝夕無哭聲流塵
集虛座宿草旅前庭階除曠遊迹園林獨餘情

翳然乘化去終天不復形遲遲將回步惻惻悲
襟盈

和

含愁一徃吊淚灑如珠零憶昔同携手何期歸
幽冥眷愛頃爾絕遺容儼若生悠悠九泉下身
朽名不傾精靈何所托世事嗟無成痛哉堂上
母二子方弱齡廣廈無客至孤房哭有聲蛛絲
蒙綠牖苔蘚餘閒庭惟有梁間燕依依戀故情
白骨埋黃土丹青寫病形不堪題挽句悽愴衷

三才圖會
卷之三
十一
腸盈

擬挽歌辭三首

有生必有死早終非命促昨暮同爲人今日在
鬼錄魂氣散何之枯形寄空木嬌兒索父啼良
友撫我哭得失不復知是非安能覺千秋萬歲
後誰知榮與辱但恨在世時飲酒不得足

和

生死人之常忽殞悲甚促午上共經行夜半入
死錄魂魄散幽冥形骸貯方木朋儕吊英魂妻

孥徒自哭音響總無聞珍味亦弗覺雖貴死無
榮貧賤亦不辱豈知一旦傾所欲恨未足

其二

在昔無酒飲今但湛空觴春醪生浮蟻何時更能
能嘗散案盈我前親舊哭我傍欲語口無音欲
視眼無光昔在高堂寢今宿荒草鄉相送出門
去歸來夜未央

和

生苦乏旨酒而今盈壺觴哀哉空列座死者豈

能嘗布帛殮其軀兒女啼其傍耳不聞人聲目
不見天光房櫳虛枕席蹤跡絕一鄉扶柩入草
莽黃沙覆中央

其三

荒草何茫茫白楊亦蕭蕭嚴霜九月中送我出
遠郊四面無人居高墳正焦堯馬爲仰天鳴風
爲自蕭條幽宅一已閉千年不復朝千年不復
朝賢達無柰何向來相送人各自還其家親戚
或餘悲他人亦已歌死去何所道託體同山阿

和

哀子遽辭世虛室冷蕭蕭精靈依故土枯骨理
荒郊松柏翳孤塚蒿萊混芻堯悲風吼長夜哀
烏鳴枝條黃土閑幽塘不知夕與朝不知夕與
朝問爾却如何惟受生前孽安知室與家朋舊
哀未徹悲聲入挽歌愁雲封隴樹孤兔伴墳阿

聯句

鳴鴈乘風飛去去當何極念彼窮居士如何不
嘆息淵明雖欲騰九萬扶搖竟何力遠招王子

喬雲駕庶可飭惜之顧侶正徘徊離離翔天側
霜露豈不切務從忘愛翼循之高柯濯條幹遠
眺同天色思絕慶未看徒使生迷惑

和

丈夫毓英氣一吐冲北極興如長江流晝夜豈
能息遨遊萬仞山乃仗神駿力強彼塵中人惟
事富貴飾閒泛滄海間醉卧青雲側忽朝大鵬
搏期展垂天翼自憐此微軀日混聲與色已悟
大道機衷心永不惑

三卷終

五柳賡歌卷之四

晉靖節徵士陶潛撰

明嘉禾周履靖和韻

金陵荆山書林梓行

雜文

歸去來兮辭

并序

余家貧耕植不足以自給幼稚盈室
餅無儲粟生生所資未見其術親故多勸
余爲長吏脫然有懷求之靡途會有四

方之事諸侯以惠愛爲德家叔以余貧苦遂見用于小邑于時風波未靜心憚遠役彭澤去家百里公田之利足以爲酒故便求之及少日眷然有歸歟之情何則質性自然非矯厲所得饑凍雖切違已交病嘗從人事皆口腹自役於是悵然慷慨深媿平生之志猶望一稔當歛裳宵逝尋程氏妹喪于武昌情在駿奔自免去職仲秋至冬在官八十餘日

因事順心命篇曰歸去來兮乙巳歲十

一月也

歸去來兮田園將蕪胡不歸既自以心爲形役
奚惆悵而獨悲悟已往之不諫知來者之可追
是迷途其未遠覺今是而昨非舟遙遙以輕颺
風飄飄而吹衣問征夫以前路恨晨光之熹微
乃瞻衡宇載欣載奔僮僕歡迎稚子候門三逕
就荒松菊猶存携幼入室有酒盈樽引壺觴以
自酌眄庭柯以怡顏倚南窓以寄傲審容膝之

易安園日涉以成趣門雖設而常關策扶老以流憩時矯首而遐觀雲無心而出岫鳥倦飛而知還景翳翳以將入撫孤松而盤桓歸去來兮請息交以絕游世與我而相違復駕言兮焉求悅親戚之情話樂琴書以消憂農人告余以春及將有事於西疇或命中車或棹孤舟旣窈窕以尋壑亦崎嶇而經丘木欣欣以向榮泉涓涓而始流善萬物之得時感吾生之行休已矣乎寓形宇內復幾時曷不委心任去留胡爲乎遑

遑兮欲何之富貴非吾願帝鄉不可期懷良辰
以孤往或植杖而耘耔登東皋以舒嘯臨清流
而賦詩聊乘化以歸盡樂夫天命復奚疑

和

歸去來兮鴛湖之濱可來歸翼此心無日不懌
丁頽俗而堪悲覩東昇與西沒歎神駿之難追
哀人事之易變奚待艾而知非採杞菊以成餉
紉荷芰而爲衣潛身虛室之中靜究道之玄微
畏澗不涉慮蹶不奔松風滿耳白雲盈門逍遙

容與幽懷常存興來倚石詩卷酒罇任清霜之
侵鬢有旨酒以酡顏喟崇宮與華屋喜蓬居之
可安羨沼魚之踴躍聽山鳥之間關得此心之
曠逸常徘徊以縱觀閒扶筇而陟徑日徇山而
始還悅鄰翁之見訪趺芳草以盤桓歸去來兮
偕鹿豕以遨遊與木石而共處樂其志而何求
鳴綠綺以適意臨禊帖而忘憂喜此心之無俗
累陋廣廈與沃疇逃禪蕭寺把釣扁舟朴質同
於太古蹤跡寄於林丘慨人情之遷變任逝水

之東流悟浮生之大夢知萬事之咸休已矣乎
此生不樂待何時芳春一去不可留胡爲乎營
營兮誠哀之榮枯有定數生死無常期藝詩書
以爲圃藉心田而耘耔度歲月以尊酒悅情趣
而廢詩信生平之無愧任其化去而無疑

閑情賦

并序

初張衡作定情賦蔡邕作靜情賦檢逸
辭而宗澹泊始則蕩以思慮而終歸閑
正將以抑流宕之邪心諒有助於諷諫

綴文之士奕代繼作並固觸類廣其辭
義余園間多暇復染翰爲之雖文妙不
足庶不謬作者之意乎

夫何瓌逸之令姿獨曠世以秀群表傾城之艷
色期有德於傳聞佩鳴玉以比潔齊幽蘭以爭
芬淡柔情於俗內負雅志於高雲悲晨曦之易
夕感人生之長勤同一盡於百年何歡寡而愁
殷褰朱幘而正坐汎清瑟以自欣送纖指之餘
好攘皓袖之纊紛瞬美目以流眄含言笑而不

分曲調將半景落西軒悲商叩林白雲依山仰
睇天路俯促鳴絃神儀嫵媚舉止詳妍激清音
以感余願接膝以交言欲自往以結誓懼冒禮
之爲讐待鳳鳥以致辭恐他人之我先意惶惑
而靡寧魂須臾而九遷願在衣而爲領承華首
之餘芳悲羅襟之宵離怨秋夜之未央願在裳
而爲帶束窈窕之纖身嗟溫涼之異氣或脫故
而服新願在髮而爲澤刷玄鬢於頽肩悲佳人
之屢沐從白水以枯煎願在眉而爲黛隨瞻視

以閑揚悲脂粉之尚鮮或取毀於華粧願在莞而爲席安弱體於三秋悲文茵之代御方經年而見求願在絲而爲履附素足以周旋悲行止之有節空委棄於牀前願在晝而爲影常依形而西東悲高樹之多蔭慨有時而不同願在夜而爲燭照玉容於兩楹悲扶桑之舒光奄滅景而藏明願在竹而爲扇含淒颺於柔握悲白露之晨零顧襟袖以緬邈願在木而爲桐作膝上之鳴琴悲樂極以哀來終推我而輟音考所願

而必違徒契契以苦心擁勞情而因訴步容與
於南林栖木蘭之遺露翳青松之餘陰儻行行
之有覲交欣懼於中襟竟寂寥而無見獨悄想
以空尋歛輕裾以復路瞻夕陽而流歎步徙倚
以志趣色慘悽而矜顏葉燮燮以去條氣淒淒
而就寒日負影以偕沒月媚景於雲端鳥悽聲
以孤歸獸索偶而不還悼當年之晚暮恨茲歲
之欲殫思宵夢以從之神飄颻而不安若憑舟
之失棹譬緣崖而無攀于時畢昴盈軒北風淒

淒惄惄不寐衆念徘徊起攝帶以伺晨繁霜粲
於素階雞歛翅而未鳴笛流遠以清哀始妙密
以閑和終寥亮而藏摧意夫人之在茲託行雲
以送懷行雲逝而無語時奄冉而就過徒勤思
以自悲終阻山而帶河迎清風以祛累寄弱志
於歸波尤蔓草之爲會誦邵南之餘歌坦萬慮
以存誠憩遙情於八遐

和

夫何人之生於世和其處而不群潛居於山之

阿喜囂誼之不聞心如秋月之朗行比踈梅之
芬身時偕於木石情恒契於溪雲厭此中之迫
阨懼力行之未勤恣逍遙於物外惟詩酒之日
殷踞石牀而得暇撫焦桐而意欣樂熙熙同太
古任岐路之俗紛耽林泉之高潔總富貴情何
分酌酒半醺抱膝北軒禽聲聒耳蒼翠凝山微
吟適意絕勝管絃潛形遁跡靜覩媸妍閒追尋
於漢晉如對古而共言覺昨非而今是免處世
之過侃宗老聃之奧語奚敢爲天下先傲烟霞

而深隱遇險巇而不遷幽懷乃得靜默豈騁時
以求芳念此身之難得喜居處於中央守雅操
以畢志免禍患之及身覩叔季之澆漓悔其過
而日新羨夷齊之高節冀巢許之比肩嘆世途
之碌碌悲日暮之憂煎戴齒髮于震土媿姓氏
之宣揚彼華堂與大厦競麗飾而奇粧豈若山
中茅舍得散誕於春秋採紫薇與青蕨日飽飫
而何求視富貴與貧賤乃天道之環旋如碧漢
流虹電頃變幻於目前時或顯在西垠而復隱

晦于東縱此性之猖狂迥塵世於不同喜有酒
之盈尊時獨酌於前楹仰皓魄之懸漢當良宵
而倍明聽靈籟之無聲搖清風之一握柰生居
於陋俗去羲皇之縵邈雅志無以爲好惟經史
與瑟琴憶子期之逝遠舉世殆鮮知音闔衡門
以高蹈乃能涵其道心郊墟環以梅植追倣孤
山之林春嗅羅浮異馥夏憇渭川清陰冲雲霄
之逸思豁溷俗之塵襟欣魚鳥之共樂悅漁樵
之相尋嘯傲恒耽丘壑心無疚而奚歎身卑棲

而志曠首雖皓而童顏採黃精可充腹納碧蘿
以禦寒固陸沉於構李時馳志於毫端喜靈臺
之明覺期淳朴之復還遇芳辰胡不樂苦歲暮
之將殫欲登高必慮險心無求乃得安群沙鷗
而戲狎捫藤蘿而躋攀常使形骸放浪此意無
悽遺絕世故任我徘徊每遊神於蓬島遠俗躅
於廷階慨隙駒之過速卽物化而生哀貴金寶
終銷鑠重梓桂還至摧企江左之英豪豈勝陶
令之懷西江之流迅逝東山之日易過鶩鶩一

枝亦足不效偃鼠飲河漱齒必藉礪石洗耳須
向澄波此梅顛之贅語賦閑情之長歌甘茅茨
之栖止何壽齡之不遐

感士不遇賦

并序

昔董仲舒作士不遇賦司馬子長又爲
之余嘗以三餘之日講習之暇讀其文
慨然惆悵夫履信思順生人之善行抱
朴守靜君子之篤素自真風告逝大僞
斯興問閭懈廉退之節市朝驅易進之

心懷正志道之士或潛玉於當年潔已
清操之人或沒世以徒勤故夷皓有安
歸之嘆三間發已矣之哀悲夫寓形百
年而瞬息已盡立行之難而一城莫賞
此古人所以染翰慷慨屢伸而不能已
者也夫道達意氣其惟文乎撫卷躊躇
遂感而賦之

咨大塊之受氣何斯人之獨靈稟神智以藏照
秉三五而垂名或擊壤以自歡或大濟於蒼生

靡潛躍之非分常傲然以稱情世流浪而遂徂
物群分以相形密綱裁而魚駭宏羅制而鳥驚
彼達人之善覺乃逃祿而歸耕山嶷嶷而懷影
川汪汪而藏聲望軒唐而永歎甘貧賤以辭榮
淳源汨以長分美惡作以異途原百行之攸貴
莫爲善之可娛奉上天之成命師聖人之遺書
發忠孝於君親生信義於鄉閭推誠心而獲顯
不矯然而祈譽嗟乎雷同毀異物惡其上妙筭
者謂迷直道者云妄坦至公而無猜卒蒙耻以

受謗雖懷瓊而握蘭徒芳潔而誰亮哀哉士之
不遇已不在炎帝帝魁之世獨祗修以自勤豈
三省之或廢庶進德以及時時既至而不怠無
爰生之晤言爰念張季之終蔽釋愍馮叟於郎
署唐賴魏守以納計尚雖僅然於必知亦苦心
而曠歲審夫市之無虎眩三夫之獻說悼賈傳
之秀朗糸遠轡於促界悲董相之淵致屢乘危
而幸濟感哲人之無偶淚淋浪以灑袂承前王
之清誨曰天道之無親澄得一以作鑒恒輔善

而佑仁夷投老以長飢回旱天而又貧傷請車
以備櫛悲茹薇而殞身雖好學與行義何死生
之苦辛疑報德之若茲懼斯言之虛陳何曠世
之無才罕無路之不澀伊古人之慷慨病奇名
之不立廣結髮以從政不愧賞於萬邑屈雄志
於戚豎竟尺土之莫及留誠信於身後慟衆人
之悲泣商盡規以拯弊言始順而患入奚良辰
之易傾胡害勝其乃急蒼旻遐緬人事無已有
感有昧疇策其理寧固窮以濟意不委曲而累

已既軒冕之非榮豈緼袍之爲耻誠謬會以取拙且欣然而歸止擁孤襟以畢歲謝良價於朝市

和

人稟混元正炁昭此心之虛靈涵道德於淵衷嗟繁擾於利名理期探于玄奧形軀庶非虛生目恒涉於墳典得究古聖之情身宜節其嗜慾羈顚願其骸形遵禮法於素履宵安寢而何驚慕龐公之鋤龍效子真之谷耕矚野雲之變幻

聽山鳥之新聲閒盤桓於山水何羨世之昌榮
日栖遲於蔀屋勝奔走於長途時樵山以供爨
坐釣磯以自娛或撫伯牙之操或誦莊生之書
縱貧簞以礙徑任蒿萊之閉閭獲此身之安逸
胡欣世之芳譽嗟乎俗多寒燠貴耳賤目明詰
者謂迂真淳者爲妄柔愚則萃衆辱智巧則罹
群謗冥契混沌不鑿柰時識之未亮拙哉我之
弗遇且藏其身於太平之世不傲慢而惕勤追
東籬之放廢日遵古聖之言靜養志於不怠一

簞蔬食亦飽敝廬風雨可蔽徜徉於巖之阿何
勞千載之計落落於天地間悠悠然於晚歲日
緘默於虛齋倦對時輩閒說腹無荆棘之腸身
處清虛之界卽富貴於當時徒紛忙而何濟樹
芳梅於郊墟喜清馨之襲袂與烟霞以爲倡喜
猿鶴時相親隱林壑全高致杜衡門而求仁心
逸而成獨樂知足而身何貧豈以千駟枉已不
爲五斗屈身晝倣書而遣思夜搜句而艱辛是
山人之事業懶與市井敷陳慨生平之未遇陟

崎嶇而多澀驚飛霜之侵鬢無芳名之可立憫
繩樞於陋居哀困身於鄉邑志與仲蔚相符名
擬孺子不及有啓期行歌樂無阮籍窮途泣嗟
一事之無成囊琴書尋山入視日月之昇沉觀
江波之湍急母營外慕身安而已完節潛名固
窮循理勿動一念之妄庶免後世非已雖終身
之弗榮喜此生之遠耻羨明月與清風日往來
之無止持靖操於明時甘餽匱而不市

桃花源記

并序詩

桃源經曰桃源山在縣南一十里西北周回三十有二里所謂桃花源也

晉太元中武陵人捕魚爲業

漁人姓黃
名道真

緣溪行

忘路之遠近忽逢桃花林夾岸數百步中無雜樹芳草鮮美落英繽紛漁人甚異之復前行欲窮其林林盡水源便得一山山有小口髮鬚若有光便捨船從口入初極狹纔通人復行數十步豁然開朗土地平曠屋舍儼然有良田美池

桑竹之屬阡陌交通雞犬相聞其中往來種作
男女衣着悉如外人黃髮垂髫並怡然自樂見
漁人乃大驚問所從來具答之便要還家設酒
殺雞作食村中聞有此人咸來問訊自云先世
避秦時亂率妻子邑人來此絕境不復出焉遂
與外人間隔問今是何世乃不知有漢無論魏
晉此人一一爲具言所聞皆歎惋餘人各復延
至其家皆出酒食停數日辭去此中人語云不
足爲外人道也既出得其船便扶向路處處誌

之及郡下詣太守說如此

太守劉歆

太守卽遣人隨

其往尋向所誌遂迷不復得路南陽劉子驥高
尚士也聞之欣然親往未果尋病終後遂無問
津者

嬴氏亂天紀賢者避其世黃綺之商山伊人亦
云逝往迹浸復湮來逕遂蕪廢相命肆農耕日
入從所憩桑竹垂餘蔭菽稷隨時藝春蠶收長
絲秋熟靡王稅荒路曖交通雞犬互鳴吠俎豆
猶古法衣裳無新製童孺縱行歌班白歡游詣

草榮識節和木衰知風厲雖無紀曆誌四時自成歲怡然有餘樂于何勞智慧竒蹤隱五百一朝敞神界淳薄旣異源旋復還幽蔽借問游方士焉測塵囂外願言躡輕風高舉尋吾契

和

秦皇亾道德高士辭濁世遁跡卜桃源一徃成長逝懼客相追尋岐路草莽廢鑿田亦可畊誅茅迺得憩竹木翳村墟四時足樹藝所喜避征徭更悅羈課稅桑杪有雞聲洞口聞犬吠食飲

恣胡麻冠服循古製徜徉巖壑中男婦時相詣
花發識陽春秋至風霜厲玉曆不待頒榮悴知
一歲達哉遺世翁何其聰且慧獨處人莫儔天
成此境界猶慮究其源叢叢芳樹蔽爲問此漁
郎入內可識外欲期探幽蹤願與彼相契

五柳先生傳

先生不知何許人也亦不詳其姓字宅邊有五
柳樹因以爲號焉閑靖少言不慕榮利好讀書
不求甚解每有會意便欣然忘食性嗜酒家貧

不能常得親舊知其如此或置酒而招之造飲
輒盡期在必醉既醉而退曾不妄情去留環堵
蕭然不蔽風日短褐穿結簾瓢屢空晏如也常
著文章自娛頗示已志忘懷得失以此自終

贊曰

黔婁有言不戚戚於貧賤不汲汲於富貴其言
茲若人之儕乎酣觴賦詩以樂其志無懷氏之
民歟葛天氏之民歟

梅顛道人傳

梅顛咸稱醉里氏也生平酷研文字荒墟惟栽
梅樹顛而成號焉恬澹寡言厭趨祿利日繙書
靜悟心解適會真意則廢寢忘食耽濁醪奇句
每醉中得朋儕愛敬若此咸相而慕之浮白殆
盡常至沉醉高懷弗退怡於閒情身居安堵悠
然以竟日鶴衣百結觀世皆空守道也或成小
詩自娛少暢所志不計得失樂天以終

贊曰

淵明高致何肯身屈卑賤樂林泉等其貴意氣

相若堪爲侶乎觀梅成詩靜養所志似羲皇之
民歟似唐虞之民歟

跋五柳詩四言五十韻

歲在癸巳時維孟春形雲蔽漢四野霾陰鳩鳴
樹杪郊甸烟暝嚴風白雪連宵兼旬漫空梨瓣
飄颻蝶翎墮盈瓊玖崎嶇無分沙汀迷迹鷗鳥
潛形梅英增白柳條減青碧桃間玉綠竹披銀
烏鵲混鷺枝栖素鶯子猷乘興袁安闔門寒窓
寐寐笑傲山人開樽酌酒擁爐燃薪焚香憑几

聊遣良辰簷噪寒鵠村犬狺狺家僅走報岸艤
短艤來自茂苑興顧隱淪迎風鼓檝冒雪登臨
疑似訪戴剡溪之征列坐言闊促膝溫存奚囊
一束靖節詩文云是宋刻楮潔板新世所罕覩
保護如珍寄貨之物見售甚勤高情眷眷幽懷
欣欣慨爾沽易命酒對斟情意相洽舉杯慇懃
展展意悅心駭目驚四言絕倡曠世寡聞辭騷
句雅榮木停雲勸農命子志曠思宏衡門高志
答龐參軍飲酒雅調歸園居吟大都漢魏尺璧

兼金擬古雜詩其聲琤琤貧士七韻毛詩逼真
欲知奇論細覩海經述酒止酒逸思縱橫怨詩
楚調情慘哀深挽歌責子悉其死生歸去來辭
獨步詞林不遇古賦妙在閒情桃花源記宛如
親行五柳小傳高逸之銘遍閱全帙利祿毛輕
再咏再謌高懷頃增情契膠漆遂爾和賡竊其
糟粕摭成鄙吟狂人孟浪遺嗤賓朋匪敢垂世
少暢余心